

JEZÚS NO LÁZARO...

Husi mate ba moris

INTRODUSAUN:

Ita-nia orasaun oferes momentu 3 kontemplasaun nian ba pasajen João 11,1-45. Protagonista sira pasajen nian: Jezús, Lázaro no nia feton sira, Judeu sira no povu, lori ita ba kontaktu ho ita-nia moris loroloron nian: amizade, partilla, moras, solidariedade, moris, mate, moris-hi'as.

Kninanuk: *Fathar I adore You...*

Hamutuk: Ha'u fiar, ha'u-nia Maromak, katak ha'u iha Ita futar oin ne'ebé hateke mai ha'u no rona ha'u-ia orasaun sira. Ita di'ak tebes no santu liu: ha'u adora Ita. Ita fó buat hotu mai ha'u: ha'u agradese Ita.

Ema ofende maka'as Ita: ha'u husu perdaun ho fuan tomak. Ita mizerikordiozu tebes: ba Ita ha'u husu grasa hotu ne'ebé Ita haree serve mai ha'u.

Invokasaun ba Espíritu Santu: *Veni Sancte Spiritus* (repete kada versu)

1. Espíritu Santu, Ita ne'ebé mai husi Aman no Oan, Ita ne'ebé horik iha ami. Harohan iha ami, serbisu iha ami. Ami husu atu halo espasu ba ita-nia liafuan sira, ba ita-nia orasaun, ba ita-nia inteligénsia iha ami atu ami bele koñese mistériu Maromak nia vontade nian iha istória. *Ref.*
2. Ami la husu atu iha asesu ba mistériu atu ami bele gaba an kona-ba ami-nia siénsia no inteligénsia tempu nian, maibé atu bele hala'o de'it ho maneira ne'ebé soi ba Na'i, atu ami bele dedika an tomak ba ami Na'i Jezús Kristu nia naran no glória (Carlo Maria Martini)



1. "IDA-NE'EBÉ ITA HADOMI MORAS"

Ita ida-idak mak ema ne'ebé Jezús hadomi no ita ida-idak mak ema ne'ebé moras, kanek. Iha Lázaro no iha Jezús ia fuan iha ita ida-idak, ema ida-idak ita-nia tempu niana.

G. Iha parte dahuluk orasaun nian, ita kontempla Jezús nia domin ba nia belun Lázaro, no iha nia, domin mai ita ida-idak. Domin ida to'o "saran nia moris rasik to'o rohan".

HUSI EVANJELLU TUIR JOÃO (Jo 11, 1-16)

L2. «Iha tempu ne'ebá, ema ida moras, naran Lázaro; nia ema Betânia, knua ida Maria ho nia biin Marta nian. Maria ne'e, mak tau mina morin ba Na'i, hodi hamaran Jezús nia ain ho nia fuuk. Nia maun Lázaro mak moras. Nia feton sira haruka fó hatene ba Jezús: "Na'i, ida-ne'ebé Ita hadomi moras." Rona tiha ne'e, Jezús dehan: "Moras ne'e la'ós atu mate; maibé atu fó glória ba Maromak, hodi halo ema fó glória ba Maromak Oan." Jezús ho Marta, nia alin, no Lázaro, sira belun boot. Maibé, rona tiha katak Lázaro moras, Nia hela tan loron rua iha ne'ebá. Liutiha ne'e, Nia dehan ba eskolante sira: "Ita ba fali Judeia." Eskolante sira hateten ba Nia: "Mestre foin daudaun Judeu sira buka atu tuda mate Ita, Ita sei hakarak fila fali ba iha ne'ebá? Jezús hatán, dehan: "La'ós loron ida iha oras sanulu-resin-rua? Ema ne'ebé la'o iha loron la sidi, basá haree naroman mundu ne'e nian; maibé nia la'o karik iha kalan, nia sidi, basá naroman la iha." Ko'alia tiha nune'e, Nia dehan tan: "Ita-nia belun Lázaro toba; Ha'u bá atu fanun nia." Eskolante sira dehan: "Na'i, nia toba karik, nia sei di'ak fali." Jezús ko'alia kona-ba Lázaro nia mate, maibé sira hanoin katak Jezús dehan Lázaro dukur de'it. Tan ne'e, Jezús dehan sai momoos: "Lázaro mate tiha ona. Ha'u haksolok tanba Ha'u la iha ne'ebá atu imi bele fiar. Ita bá haree nia." Tomé, ida ne'ebé ema hanaran Kaduak, dehan ba nia maluk sira: "Ita mós bá atu mate hamutuk ho nia"»

Tempu silénsiu nian no enkontru ho Liafuan.

Orasaun

G. Aman Maromak,

Ita ne'ebé hatudu ita-nia kompaixaun
Iha Jezús nia tanis ba belun Lázaro,
hateke mai ami ida-idak, tama iha ami-nia fuan laran.
Halo atu ami rekoñese ami-nia moras interiór sira,
atu hatene fó naran ba moras sira.
Fanun ami husi sentimentu mate nian,
husi ami-nia "dukur espirituál" sira.
Ita, Maromak moris nian
Halo ami sai kriatura foun iha Ita.

Pauza

2. "ITA IHA-NE'E KARIK..."

Ita-nia 'karik' sira, ita-nia'maibé' sira,,, ita-nia laran-metin ne'ebé nakdoko iha Kristu. Fiar ida ne'ebé nafatin hetan provasaun no Maromak ida ne'ebé loroloron hafoun ita ho ninia domin... to'o saran nia moris mai ita!



G. Iha momentu daruak ne'e, ita kontempla Marta no Maria, ita-nia resposta fiar nian ba Jezús nia domin nakonu ho pasiénsia no atensaun, fiar ida ne'ebé nakdoko, nafatin iha dúvida no presiza hafoun beibeik...

HUSI EVANJELLU TUIR JOÃO (Jo 11, 17-31)

- L3. «To'o tiha ne'ebá, Jezús hetan nia belun ema hakoi liu tiha laron haat. Betânia besik Jerusalém kala kilómetru tolu. Judeu barak ba haree Marta no Maria atu fó ksolok tanba sira nia maun mate. Rona katak Jezús to'o daudaun, Marta sai ba hasoru Nia. Maria tur hela iha uma. Marta dehan ba Jezús: "Na'i, Ita iha ne'e karik, Ha'u nia maun la mate! Maibé oras ne'e mós Ha'u hatene katak Maromak sei haraik ba Ita buat ne'ebé Ita husu ba Nia." Jezús hatán ba nia: "Ó-nia maun sei moris hi'as." Marta simu: "Ha'u hatene katak nia sei moris hi'as iha laron ikus." Jezús dehan teni ba nia: "Ha'u ne'e moris hi'as no moris. Ema ne'ebé fiar Ha'u, maski mate ona, nia sei moris. Ema hotu ne'ebé moris hodi fiar Ha'u, nia sei la mate tan. Ó fiar lia ne'e?" Marta dehan: "Ha'u fiar, Na'i; Ha'u fiar katak Ita mak Messias, Maromak Oan, ne'ebé atu mai iha mundu." Dehan tiha ne'e, Marta bolu nia alin Maria, hodi dehan sub-subar: "Mestre iha ne'e, Nia bolu ó." Rona tiha ida ne'e, Maria hamriik kedas hodi ba buka Jezús. Jezús seidauk tama iha knua; Nia sei hela iha fatin ne'ebé Marta hasoru Nia. Wainhira Judeu sira ne'ebé hamutuk ho Maria iha uma hodi fó ksolok haree nia hamriik no sai lalais, sira tuir nia, tan hanoin katak nia ba tanis iha rate».

Tempu silénsiu no konfrontu ho Liafuan

Rona: Guida forte il mio nome

Credo in te, Signore, mia
risurrezione e mia salvezza, fonte
della vera libertà. Dal mio buio, dal
mio nulla tu mi chiami alla vita.

*Apri il mio sepolcro, Signore,
chiamami alla vita con te! Toglimi
la pietra dal cuore.*

Grida forte il mio nome,

Gesù! Grida forte il mio nome, Gesù!

Vieni in me, Signore, spezza le
catene del timore, scioglimi le
ali dell'amore. Con la voce del
mio pianto grido a te la mia
preghiera.

*Apri il mio sepolcro, Signore,
chiamami alla vita con te! Toglimi
la pietra dal cuore.*

Grida forte il mio nome,

Gesù! Grida forte il mio nome, Gesù

3. "SAI MAI LI'UR"...

Liafuan ida salvasaun nian diriji ba Lázaro, ba Marta, ba Maria, mai ita. Ita simu bolun atu sai husi ita-nia rate no bá hasoru moris, hasoru istória, nu'udar ema moris hi'as sira hanesan Nia!



G. Iha orasaun nia parte datoluk ne'e ita kontempla ho Jezús nia emosaun bainhira haree Lázaro nia feton sira nia tanis no Judeu sira-nian. Jezús nia liafuan nia kbiit "Lázaro, sai mai li'ur" mak salvasaun ba nia no mai ita ida-idak. Liafuan libertasaun no moris foun nian iha Nia.

HUSI EVANJELLU TUIR JOÃO (Jo 11, 32-45)

L4. «To'o tiha iha fatin ne'ebé Jezús hela ba, hodi hare Nia, Maria monu ba Jezús nia ain, dehan: "Na'i, Ita iha ne'e karik, Ha'u nia maun la matel!" Hare tiha nia tanis, no mós hare Judeu sira ne'ebé mai ho nia tanis hotu, Jezús nia laran taridu teb-tebes, neon susar, tan hanoin. Hafoin Nia husu: "Imi tau nia iha ne'ebé?" Sira hatán: "Ita mai haree, Na'i." Jezús tanis. Judeu sira dehan: "Haree bá oinsá Na'i hadomi nia!" Maibé balun dehan fali: "Nia ne'ebé loke matan-delek nia matan, labele halo ema ne'e keta mate?" Nia laran taridu dala ida tan, Jezús hakbesik ba rate. Rate ne'e, fatuk kuak ida ne'ebé taka hela ho fatuk boot ida. Jezús dehan: "Imi hasai tiha fatuk." Marta, matebian nia feton, hatán: "Iis ona, Na'i; loron haat ona" Jezús dehan: Ha'u la dehan ba ó katak ó fiar karik, ó sei haree Maromak nia glória?" Sira hasai fatuk. Jezús foti matan ba lalehan, dehan: "Aman, Ha'u fó agradese ba Ita-Boot tan Ita rona Ha'u." Ha'u hatene nanis ona katak Ita rona Ha'u nafatin; maibé Ha'u ko'alia nune'e tanba povu ne'ebé hale'u Ha'u, atu sira fiar katak Ita haruka Ha'u mai." Dehan tiha ne'e, Nia foti lia maka'as, dehan: "Lázaro, sai mai li'ur!" Matebian sai mai ho liman no ain falun tiha ho hena. Nia oin taka ho lensól ida. Jezús dehan ba sira: "Kore tiha nia, hodi husik nia la'o bá"».

Tempu silénsiu no orasaun nian ho Liafuan

G. Depoizde tempu orasaun pesoál nian ida-ne'e, ita bele partilla ka fahe espresaun ka fraze ida husi Liafuan ne'ebé kona liu ita no ne'ebé ita hakarak lori iha fuan no iha moris.

Knananuk: Ha'u sei dehan se ó fiar Na'i Maromak (depoizde kada sharing)

INTERSESAUN

G: Ita husu Aman Maromak, ne'ebé kria família umana ho domin, no iha ninia mizerikordia salva nia ho nia Oan nia raan, atu rona ita-nia orasaun sira.

Ita hatán ho ref: O Senhor fez em mim maravilhas, Santo é o Seu nome.

1. Ba Kreda: Atu Jezús nia Espozu fase ho nia raas rasik nia doben nia salan sira. Ita harohan ba Na'i.
2. Ba mundu: atu Na'i, ne'ebé ho nia krús hasai ema husi mate nia ukun, loke ba povu hotu dalan Evanjellu nian. Ita harohan ba Nai.
3. Ba nasaun sira ne'ebé funu: atu Na'i nia Paz bele ukun iha ema ida-idak nia fuan, iha família ida-idak no iha nasaun ida-idak.
4. Ba ema maksalak sira: atu Kristu ne'ebé fanun Lázaro husi dukur mate nian, halo atu ema sir ane'ebé mate tanba salan bele fila hikas ba moris liuhusi peniténsia. Ita harohan ba Na'i.
5. Mai ita ne'ebé halibur iha ne'e, atu ita hadomi malu hanesan Kristu hadomi ita no saran noa an raik mai ita. Ita harohan ba Na'i.

Ami Aman

G: Aman Kbiit-Tomak Na'in no laran-sadia. Ita haruka ita Oan mane atu liuhusi nia terus halakon salan no mate, no haraik moris no ksolok ho ninia moris-hi'as. Rona Kreda nia hamulak no haraik atu ami bele haksolok husi Jezús Kristu nia makso'in, Nia ne'ebé moris no ukun tinan ba tinan nafatin.

Ámen.

Knananuk: És a minha vida